

Polugodišnji bilten

juli-decembar 2024

**MINISTARSTVO SIGURNOSTI BOSNE I HERCEGOVINE
ODSJEK ZA BORBU PROTIV TRGOVINE LJUDIMA**

STATISTIČKI PODACI ZA 2024. GODINU

Tokom 2024. godine, ukupno 37 lica je identifikovano kao potencijalne žrtve trgovine ljudima u Bosni i Hercegovini, od čega je 16 ženskog pola, a 21 muškog pola, 12 žrtava je punoljetno (pet žrtava ženskog pola, sedam žrtava muškog pola), a 25 žrtava je maloljetno (11 ženskog pola, a 14 muškog pola). U pogledu oblika eksploatacije, tokom 2024. godine, registrovano je 12 slučajeva prosjačenja, šest slučajeva seksualnog iskorištavanja, osam slučajeva radne eksploatacije, i 10 drugih oblika eksploatacije. U pogledu državljanstva, 24 žrtve su državljani Bosne i Hercegovine, 13 žrtava su strani državljani, od čega je jedna žrtva državljanin Rusije, osam žrtava su državljani Turske, Hrvatske, Afganistana, i Njemačke. U izvještajnom periodu u sigurnim kućama su boravile 24 žrtve trgovine ljudima.

„LJETNA POLICIJSKA ŠKOLA”

Projekat Vijeća Evrope je podržao organizaciju „Ljetne policijske škole” Policije Brčko distrikta Bosne i Hercegovine, koja je u 2024. godini obilježila 10 godina postojanja. Program ove škole je osmišljen kao preventivni program namijenjen mladima i kao posebna aktivnost rada policije u zajednici. Strukturu polaznika ove škole čine mladi od 15 do 35 godina. Ljetna policijska škola realizirana je u periodu od 20. do 23. augusta 2024. godine, a projekat je podržao posjetu 58 polaznika škole Državnoj agenciji za istrage i zaštitu (SIPA), 22. augusta 2024. godine, koju je također podržalo Koordinaciono tijelo za borbu protiv trgovine ljudima Brčko distrikta BiH. Tema posjete je bila „Podizanje svijesti o problemu trgovine ljudima”.



PODRŠKA PROJEKTA VIJEĆA EVROPE ZA BORBU PROTIV TRGOVINE LJUDIMA U ORGANIZACIJI STRUČNOG SAVJETOVANJA TUŽILACA (PANEL O TRGOVINI LJUDIMA)

Projekat Vijeća Evrope za borbu protiv trgovine ljudima, u saradnji sa partnerima (Misija OSCE-a u BiH, IOM, MFS-EMMAUS i EU4FAST) je, kao i svake godine, u okviru godišnjeg događaja, **XVII Stručnog savjetovanja tužilaca, od 2. do 4. septembra 2024. godine u Neumu, organizovao Panel o trgovini ljudima**, u cilju podrške jačanju kapaciteta pravosudnih profesionalaca u Bosni i Hercegovini. Stručno savjetovanje je okupilo 39 stručnjaka među kojima tužitelje, predstavnike agencija za provođenje zakona i akademske zajednice te međunarodnih i nevladinih organizacija.




Panel diskusija je obuhvatila teme kao što su mehanizmi upućivanja, pristup žrtava pravdi, procedure smještaja i rad sigurnih kuća, kao i pristup u čijem središtu je žrtva i pristup koji uzima u obzir doživljenu traumu, pitanje pristanka žrtava, posebno u predmetima trgovine ljudima uz korištenje cyber tehnologija.

Edukatori angažovani od strane Vijeća Evrope održali su radionicu o pravima žrtava i situacijama sa kojima se žrtve suočavaju u prvom kontaktu sa profesionalcima. Takođe su razgovarali o pružanju

besplatne pravne pomoći žrtvama trgovine ljudima, kao i o novim izazovima vezanim za slučajeve trgovine ljudima koji uključuju internet i tehnologiju, kao što su značajne poteškoće u prikupljanju digitalnih dokaza.

REGIONALNA KONFERENCIJA „UTICAJ TEHNOLOGIJE NA TRGOVINU LJUDIMA: PROMJENA PRISTUPA ZA EFIKASNIJI ODGOVOR”



Projekat Vijeća Evrope, u saradnji sa sestrinskim projektima za borbu protiv trgovine ljudima iz Srbije i Sjeverne Makedonije, i uz podršku Ministarstva sigurnosti BiH, je organizovao regionalnu konferenciju na temu izazova koje postavlja rastuća upotreba informacionih i komunikacionih tehnologija (IKT) za regrutovanje, kontrolu i eksploataciju žrtava trgovine ljudima. Više od 50 domaćih i regionalnih stručnjaka sastalo se na dvodnevnoj konferenciji u Sarajevu, 2. i 3. oktobra 2024. godine, kako bi razgovarali o ovim izazovima i razmijenili najbolje prakse. Posebno se razmatrala zaštita i razmjena digitalnih dokaza u slučajevima trgovine ljudima, načini na koje korištenje IKT-a može ojačati prevenciju trgovine ljudima i poboljšati pristup žrtvama uslugama. Fokus je također bio i na saradnji i partnerstvu između vlada, tehnoloških kompanija, finansijskih institucija i civilnog društva. Konferencija je rezultirala povezivanjem i pojačanom saradnjom stručnjaka iz različitih sektora i agencija.

KONSULTACIJE SA INSTITUCIJAMA I NEVLADINIM ORGANIZACIJAMA O AKCIJI PROTIV TRGOVINE LJUDIMA U BOSNI I HERCEGOVINI



Projekat Vijeća Evrope podržao je koordinacijski sastanak organizovan od strane Ministarstva sigurnosti Bosne i Hercegovine, 10. i 11. oktobra 2024. godine u Sarajevu. Trideset učesnika koordinacijskog sastanka diskutovalo je i davalo povratne informacije vezane za stvarno stanje na terenu u oblasti borbe protiv trgovine ljudima. Razgovaralo se i o izradi akcionih planova i provedbi novousvojene Strategije.

RADIONICA VIJEĆA EVROPE NA TEMU KORIŠTENJA ODUZETE NELEGALNO STEČENE IMOVINE ZA OBEŠTEĆENJE ŽRTAVA TRGOVINE LJUDIMA

S ciljem otvaranja rasprave o mogućnostima uspostave mehanizma za obeštećenje žrtava trgovine ljudima putem oduzete imovine od trgovaca ljudima, projekat Vijeća Evrope za borbu protiv trgovine ljudima, u saradnji sa Ministarstvom

sigurnosti BiH, organizirao je, 30. i 31. oktobra 2024. godine na Jahorini, radionicu „Trgovina ljudima, finansijske istrage i oduzimanje i korištenje oduzete imovine za naknadu štete žrtvama trgovine ljudima”. Razgovarano je o konkretnim izazovima u provođenju finansijskih istraga, identifikaciji, lociranju i procjeni specifičnih oblika imovine stečene trgovinom ljudima, prevenciji i mjerama suzbijanja pranja novca u kontekstu trgovine ljudima kao predikatnog kaznenog djela. Radionica je rezultirala zaključcima i prijedlozima za dalje djelovanje u ovoj oblasti, koji će biti uvaženi prilikom izrade novog Akcionog plana za borbu protiv trgovine ljudima u BiH.



Radionica je okupila 30 stručnjakinja i stručnjaka. Naglašen je značaj međuinstitucionalne i međunarodne saradnje u otkrivanju, praćenju te privremenom i trajnom oduzimanju imovinske koristi stečene trgovinom ljudima. Teme diskusije su također bile upravljanje oduzetom imovinom te mogućnosti društvene prenamjene oduzete dobiti s ciljem pomoći, rehabilitacije i obeštećenja žrtava trgovine ljudima. Predstavljena je praksa rada Tužiteljstva Bosne i Hercegovine, ali i pregled dobrih praksi u trajnom oduzimanju nezakonite imovinske koristi stečene trgovinom ljudima.

CERTIFICIRANI TRENERI PROVELI PRVE SAMOSTALNE OBUKE

Certificirani voditelji i voditeljice obuke (14), odabrani iz redova policijskih agencija i inspektorata rada, koji su, u periodu između aprila i juna 2024. godine, prošli specijaliziranu obuku na osnovu modula i materijala koje je

razvilo Vijeće Evrope, proveli su niz edukacijskih sesija o suzbijanju trgovine ljudima u svrhu radne eksploatacije za više od 50 stručnih osoba iz Bosne i Hercegovine. To je bio njihov **prvi samostalni angažman** u svojstvu novih resursnih tačaka za edukaciju i gradnju kapaciteta, čime se doprinosi **održivosti i kontinuiranom razvoju lokalnih napora na suzbijanju trgovine ljudima u Bosni i Hercegovini**.

Jednodnevne osnovne obuke održane u Banjaluci (18. novembra), Bihaću (19. novembra), Brčkom (20. novembra) i Sarajevu (21. novembra) obradile su važne teme poput osnovnih elemenata trgovine ljudima, mehanizama za suzbijanje trgovine ljudima u Bosni i Hercegovini, pravnog okvira, kao i indikatora za prepoznavanje žrtava trgovine ljudima. Naglašen je **ključni značaj višesektorskog pristupa**, a posebno promicanja saradnje između inspekcije rada i policijskih agencija. Učesnici i učesnice su također imali priliku učiti na primjerima stvarnih slučajeva trgovine ljudima u svrhu radne eksploatacije, a neki od njih su se sa ovim temama susreli po prvi put.

Certificiranim službenicima i službenicama svečano su uručeni certifikati prilikom [završnog događaja projekta](#) Vijeća Evrope, 5. decembra 2024. godine u Sarajevu.



KROZ PROGRAM DODJELE BESPOVRATNIH SREDSTAVA VIJEĆA EVROPE, UDRUŽENJE „ZEMLJA DJECE U BIH” REALIZOVALO PROJEKAT SA FOKUSOM NA PREVENCIJU TRGOVINE DJECOM

U periodu od 15. februara do 25. novembra 2024. godine, Udruženje „Zemlja djece u BiH” iz Tuzle je, kroz dodijeljena bespovratna sredstva, implementiralo projekat „*Poboljšanje nacionalnog referalnog mehanizma za borbu protiv trgovine djecom u Bosni i Hercegovini u 5 lokalnih zajednica*”. Neki od rezultata su: uspostavljeni lokalni referalni mehanizmi kojima koordiniraju centri za socijalnu zaštitu u ciljnim zajednicama Olovo, Kiseljak, Velika Kladuša i Brčko Distrikt BiH koji funkcioniraju kao lokalni multisektorski timovi i predstavljaju operativni okvir za identifikaciju, upućivanje i zaštitu potencijalnih žrtava trgovine djecom. Pored toga, organizovano je 10 radionica i 3 obuke za lokalne institucije, sa fokusom na preventivne mjere i tehnike identifikacije. Također, potpisana su tri protokola za prevenciju, proaktivnu identifikaciju i upućivanje u slučajevima trgovine djecom u Federaciji Bosne i Hercegovine (Olovo, Kiseljak, Velika Kladuša), izrađene su Standardne operativne procedure u Brčko distriktu BiH (dokument dostavljen Vladi Brčko Distrikta BiH na usvajanje) te je izrađen nacrt okvirnih operativnih procedura za Republiku Srpsku koje su korištene pri izradi sveobuhvatnih operativnih procedura za borbu protiv trgovine ljudima.




KROZ PROGRAM DODJELE BESPOVRATNIH SREDSTAVA VIJEĆA EVROPE, NEVLADINA ORGANIZACIJA CENTAR ZA LJUDSKA PRAVA U MOSTARU REALIZOVALA PROJEKAT SA FOKUSOM NA PRAVA ŽRTAVA I BESPLATNU PRAVNU POMOĆ

U periodu od 31. maja do 15. novembra 2024. godine, Centar za ljudska prava u Mostaru je, kroz dodijeljena bespovratna sredstva, implementirao projekat „*Poboljšanje pristupa pravdi za žrtve trgovine ljudima kroz besplatnu pravnu pomoć*”. Neki od rezultata uključivali su povećanje kapaciteta članova mreže za pružanje besplatne pravne pomoći (FLA mreža), pravnika, sudaca i tužitelja kroz dvije obuke (30 pravnih stručnjaka); izrađen i usvojen Akcioni plan mreže o pristupu pravdi i besplatnoj pravnoj pomoći u Bosni i Hercegovini (2024-2026); Memorandum o razumijevanju za jačanje pružanja pravne pomoći i besplatne pravne pomoći žrtvama trgovine ljudima potpisalo je 13 članica mreže.



VIJEĆE EVROPE IMPLEMENTIRALO AŽURIRANU VERZIJU HELP ONLINE OBUKE NA TEMU TRGOVINA LJUDIMA



Projekat Vijeća Evrope za borbu protiv trgovine ljudima u Bosni i Hercegovini je, u drugoj polovini 2024. godine, realizovao još jednu HELP online obuku na temu trgovina ljudima, koje je razvio Program Vijeća Evrope [HELP](#).

HELP online obuka je pokrenuta 20. septembra 2024 godine (završena 10. decembra) i predstavlja ažuriranu verziju generalne obuke Vijeća Evrope na temu trgovina ljudima. Cilj je povećanje kapaciteta pravnog i drugog relevantnog stručnog osoblja za otkrivanje, identifikaciju, istrage, kazneni progon i procesuiranje slučajeva trgovine ljudima, kao i zaštitu prava žrtava u skladu sa Konvencijom Vijeća Evrope o akciji protiv trgovine ljudima.

Nova verzija obuke uključuje najnoviju praksu Evropskog suda za ljudska prava i Suda pravde Evropske unije, kao i pravni okvir Evropske unije i Vijeća Evrope. Sadržaj kursa je prilagođen zakonskom okviru Bosne i Hercegovine. Od 36 prijavljenih stručnih osoba, njih 21 je uspješno završilo sve module i dobilo certifikat.

Vijeće Evrope je ukupno tokom pet godina realizacije projekata za borbu protiv trgovine ljudima u Bosni i Hercegovini realiziralo šest HELP online obuka koje je uspješno završilo 107 bh. profesionalaca.

NOVI ALATI ZA EFIKASNO SPREČAVANJE, OTKRIVANJE I ISTRAGE TRGOVINE LJUDIMA U BOSNI I HERCEGOVINI


Vijeće Evrope je u okviru realizacije projekta za jačanje borbe protiv trgovine ljudima u Bosni i Hercegovini razvilo i objavilo novi **Resursni paket** koji čine **Priručnik** i **materijali za obuke**, a u cilju kvalitetnijeg sprečavanja, otkrivanja i istraga slučajeva trgovine ljudima u svrhu radne eksploatacije.



Kreirani materijali su testirani od strane voditelja i voditeljica obuka **certificiranih u okviru projekta Vijeća Evrope** u periodu od aprila do juna 2024. godine. Ove stručne osobe **vodile su svoje prve samostalne osnovne obuke u novembru** za oko 60 službenika i službenica za provedbu zakona i inspektorata rada. Zahvaljujući obuci Vijeća Evrope, a i novom Resursnom paketu, ovi će certificirani stručnjaci i stručnjakinje nastaviti prenositi znanja svojim kolegicama i kolegama, a evidentirani su kao voditelji obuke i u Ministarstvu sigurnosti BiH.

Također, izrađen je i **Resursni paket za pružaoce besplatne pravne pomoći** na temu prava žrtava (Trgovina ljudima: **fenomen, položaj i prava žrtava: priručnik, brošura za žrtve trgovine ljudima, brošura za pružaoce pravne pomoći i materijali za trenere**). Ovaj resursni paket će se koristiti za obuke na temu prava žrtava trgovine ljudima u krivičnom postupku koje će biti organizovane za pružaoce besplatne pravne pomoći, pravnike i nevladine organizacije tokom 2025. godine. Resursni paketi dostupni su i na web stranici Ministarstva sigurnosti Bosne i Hercegovine i ponuđeni za upotrebu svim zainteresiranim institucijama i profesionalcima.

ZAVRŠNA KONFERENCIJA PROJEKTA „GLAS ORGANIZACIJA CIVILNOG DRUŠTVA U BORBI PROTIV TRGOVINE LJUDIMA”



U julu 2024. godine, održana je završna konferencija projekta „Glas organizacija civilnog društva u borbi protiv trgovine ljudima”, finansiranog od strane Europske unije. Konferencija je okupila ključne aktere iz BiH, ističući izazove i postignuća u borbi protiv trgovine ljudima. Tom prilikom, predstavljen je *Izveštaj o rezultatima praćenja politika suzbijanja trgovine ljudima unutar Državnog referalnog mehanizma u Bosni i Hercegovini*, sa posebnim naglaskom na nedostatke u postupanju sa žrtvama. Govornici su istakli potrebu za boljom koordinacijom između institucija i nevladinih organizacija, posebno u oblasti zaštite maloljetnih žrtava.

Izveštaj o rezultatima praćenja politika suzbijanja trgovine ljudima unutar Državnog referalnog mehanizma u Bosni i Hercegovini pruža detaljan pregled izazova u borbi protiv trgovine ljudima, sa fokusom na institucionalne odgovore i pomoć žrtvama u zemlji. U izvještaju se analizira primjena nacionalnog zakonodavstva i strategija, uključujući djelovanje koordinacionih timova i nevladinih organizacija, koje su kroz monitoring ukazale na

brojna poboljšanja i nedostatke u tretmanu žrtava trgovine ljudima. Posebna pažnja posvećena je ženama i djeci, čiji je položaj u društvu posebno ranjiv u procesu borbe protiv trgovine ljudima. Razvijene su i preporuke za daljnje unapređenje zakonodavnih okvira i institucionalnih kapaciteta, a izvještaj uključuje i analize provedenih studija slučaja.

PROJEKAT JAČANJE KAPACITETA PREŽIVJELIH ŽRTAVA TRGOVINE LJUDIMA I SLUŽBENIKA PODRŠKE

U okviru projekta *Jačanje kapaciteta preživjelih žrtava trgovine ljudima i službenika podrške*, realizovanog kroz USAID/INSPIRE program, provedena je tradicionalna i online kampanja s ciljem povećanja svijesti o trgovini ljudima u digitalnom okruženju. Poseban fokus stavljen je na jačanje znanja svih ciljnih skupina o mehanizmima prijave i dostupnoj podršci za žrtve trgovine ljudima, kao i na podizanje opće svijesti javnosti o različitim oblicima trgovine ljudima putem digitalnih tehnologija te metodama zaštite.



Tokom izvještajnog perioda, poseban fokus stavljen je na medijsku kampanju, koja je obuhvatila emitovanje radio džinglova, city


light kampanju te inovativne online aktivnosti usmjerene na podizanje svijesti i edukaciju ciljnih grupa.

Jedan od ključnih rezultata projekta je izrada *Priručnika za pružanje podrške svjedocima žrtvama trgovine ljudima u Bosni i Hercegovini, s posebnim naglaskom na djecu*. Priručnik predstavlja vrijedan resurs za stručnjake iz različitih institucija koji direktno rade sa žrtvama, pružajući jasne smjernice za osiguravanje zaštite njihovih prava tokom sudskih postupaka. Poseban fokus stavljen je na pravnu i psihološku podršku djeci, kao jednoj od najranjivijih kategorija žrtava, uz naglašavanje važnosti besplatne pravne pomoći. Priručnik, u skladu s međunarodnim standardima i domaćim pravnim okvirom, nudi praktične informacije i preporuke za sve profesionalce koji rade na zaštiti i podršci žrtvama trgovine ljudima.


interneta i tehnologije. Kampanja je bila usmjerena na žrtve i rizične grupe, posebno djecu i mlade, kao i građane BiH u potrazi za zaposlenjem u inostranstvu. Kampanja je značajno doprinijela edukaciji javnosti o sigurnom korištenju interneta, načinima prijave i mehanizmima zaštite korištenjem digitalnih alata, uključujući web platforme, društvene mreže, vizuale, reelse i podcaste sa stručnjacima.

Dio aktivnosti uključivao je i online anketu koja je pokazala visok nivo svijesti o fenomenu trgovine ljudima, ali i zabrinjavajuće podatke o nepromišljenom dijeljenju ličnih podataka prilikom traženja posla online. Kampanja je uspješno ostvarila ciljeve projekta, doprinoseći povećanju znanja o trgovini ljudima u digitalnom okruženju, mehanizmima podrške i prevenciji, a prikupljeni podaci poslužit će kao temelj za daljnje strategije suzbijanja ovog problema u BiH.



EVROPSKI DAN BORBE PROTIV TRGOVINE LJUDIMA



Tokom oktobra 2024. godine, s posebnim aktivnostima realizovanim 18. oktobra (Evropski dan borbe protiv trgovine ljudima), MFS-EMMAUS, uz podršku Ministarstva sigurnosti BiH, realizirao je inovativnu online kampanju *Zajedno za sigurnost* s ciljem podizanja svijesti o trgovini ljudima putem




KOORDINACIJSKI SASTANAK KLJUČNIH AKTERA KOORDINACIJSKOG MEHANIZMA ZA BORBU PROTIV TRGOVINE LJUDIMA U BIH




Smatrate li da su online platforme za traženje poslova pouzdane?



Kako verifikujete ponudu za posao online?



Jeste li ikada dostavili sljedeće podatke online prilikom traženja posla?



99 ispitanika je navelo da su ostavili svoje ime i prezime prilikom online traženja posla (**59%**), dok ih je **94** ostavilo svoj mail kontakt (**56%**). Također, **73** ispitanika su nekada ostavila svoju biografiju, koja sadrži veliki broj ličnih podataka (**44%**), dok je **44** ispitanika ostavilo svoju fotografiju (**26%**)

Da li biste prijavili sumnjive aktivnosti ili oglase na internetu za koje smatrate da su povezani sa trgovinom ljudima?



Koje mjere su po vama najefikasnije za smanjenje trgovine ljudima u Bosni i Hercegovini?



36 ispitanika smatra da su kampanje najefikasnije za smanjenje trgovine ljudima (**21%**), dok **24** ispitanika smatraju da bi bojom edukacijom u školama doprinijeli rješavanju ovog problema (**14%**). Veće kazne za počinioce su najefikasnije za **30** ispitanika, koji smatraju da bi većim kaznama, odnosno reformom zakonodavstva smanjili broj slučajeva vezanih za trgovinu ljudima (**18%**).

UKOLIKO STE ŽRTVA TRGOVINE LJUDIMA ILI SUMNJATE NA TRGOVINU LJUDIMA, ANONIMNO PRIJAVLJIVANJE JE MOGUĆE PUTEM WEB PORTALA WWW.SIGURNODIJETES.BA I WWW.EURCENTER.BA ILI PUTEM BESPLATNE LINIJE ZA SAVJETE I PODRSKUNA: 0800 22 323

U okviru projekata „BiH: Prevencija i zaštitno-osjetljivo procesuiranje trgovine ljudima” i „Zajedničke akcije Zapadnog Balkana protiv krijumčarenja migranata i trgovine ljudima” (WBJAST), IOM BiH je 9. jula 2024. godine na Jahorini organizovao redovni koordinacijski sastanak lokalnih koordinatora za borbu protiv trgovine ljudima.



Sastanak je imao za cilj pružanje pregleda trenutne situacije, tekućih i planiranih aktivnosti unutar koordinacijskih timova, s posebnim fokusom na Strategiju borbe protiv trgovine ljudima (2024-2027) i razvoj lokalnih akcionih planova. Sastanku su se pridružili predstavnici međunarodnih organizacija aktivnih u borbi protiv trgovine ljudima, kako bi koordinirali buduće projektne aktivnosti s ciljem efikasne implementacije.

VALIDACIJSKA RADIONICA ZA ADAPTACIJU DIGITALNE APLIKACIJE ZA PROAKTIVNU IDENTIFIKACIJU ŽRTAVA TRGOVINE LJUDIMA

Na osnovu rezultata i preporuka validacijske radionice, održane 10. jula 2024. godine na Jahorini, IOM će raditi na adaptaciji aplikacije za proaktivnu identifikaciju (potencijalnih) žrtava trgovine ljudima, prethodno razvijenu u saradnji sa Ministarstvom sigurnosti BiH.



Cilj radionice bio je prikupiti povratne informacije i preporuke od 24 ključna učesnika koji su uključeni u odgovor na trgovinu ljudima u BiH, o tome kako najefikasnije ažurirati aplikaciju kako bi obuhvatila nove primijećene trendove

(npr. radnu eksploataciju migranata i digitalno omogućenu trgovinu ljudima) i pojednostavila njene indikatore, proširujući njenu upotrebu među praktičarima i javnošću. Radionica je rezultirala setom preporuka koji služe kao osnova za dalje korake u adaptiranju aplikacije.

CHAINALYSIS – IZAZOVI I TRENDOWI U PRAĆENJU KRIPTOVALUTA

IOM je podržao organizaciju radionice o praćenju kriptovaluta koju je održala kompanija Chainalysis, specijalizovana za finansijske istrage vezane za kriptovalute.

Radionica je održana 1. augusta 2024. godine u Ministarstvu unutrašnjih poslova (MUP) Republike Srpske (RS) u Banjoj Luci.

Sesija je obučila 24 učesnika o analizi blockchaina, navigaciju kroz korisnički interfejs, i praktične pristupe istraživanju krivičnih djela povezanih sa kriptovalutama, uključujući generisanje tragova, istraživačke taktike i oduzimanje digitalnih sredstava.

XVII TUŽILAČKI SIMPOZIJ

IOM je učestvovao u organizaciji Panela II – „Borba protiv trgovine ljudima” u okviru XVII Tužilačkog simpozija, održanog u Neumu (BiH) od 2. do 4. septembra 2024. godine. Panel je organizovan uz podršku projekta WBJAST, Misije OSCE-a u BiH, Vijeća Evrope, GIZ-a i Međunarodnog foruma solidarnosti – Emmaus. Panel je potaknuo aktivno učešće 31 učesnika, uključujući tužioce, sudije, policiju i predstavnike nevladinih organizacija iz Bosne i Hercegovine.



Učesnici su diskutovali o stvarnim slučajevima i razmjenjivali stavove o modernim istražnim tehnikama, a poseban naglasak stavljen je na pristupe osjetljive na žrtve, uz podršku uvida stručnjaka iz oblasti provođenja zakona, pravne struke i psihologije.

REGIONALNA OBUKA TRENERA: „DIGITALNE ISTRAGE”

Obuka pod nazivom „Osnaživanje profesionalaca u borbi protiv trgovine ljudima i krijumčarenja migranata: Digitalne istrage” održana je od 24. do 26. septembra 2024. godine u Banjoj Luci za 30 učesnika (12 žena, 18 muškaraca). Ova obuka organizovana je kao nastavak regionalne obuke trenera, tokom koje je formirana grupa certifikovanih trenera, koji su sada dobili priliku da prenesu stečena znanja na nacionalnom nivou. Posebno je značajno što su uloge edukatora tokom ove obuke preuzeli državni tužilac, jedan istražitelj iz SIPA-e te istražitelji iz Granične policije (BP) i MUP-a RS. Obuka je organizovana u saradnji sa centrima za edukaciju sudija i tužilaca iz Federacije BiH i Republike Srpske (CEST FBiH i RS). Glavni cilj bio je osposobiti tužioce, policijske službenike i istražitelje za rad sa predmetima visokotehnološkog kriminala i tehnikama digitalnih istraga, kako bi unaprijedili svoje sposobnosti u istragama i procesuiranju slučajeva trgovine ljudima i krijumčarenja, gdje su krivična djela omogućena digitalnim sredstvima.

REGIONALNA KONFERENCIJA „LIBERALIZACIJA PRISTUPA TRŽIŠTU RADA: POTENCIJAL REGULARNE MIGRACIJE I PREVENCIJA RIZIKA POVEZANIH S NESIGURNIM ZAPOSLENJEM I TRGOVINOM LJUDIMA”



IOM je podržao regionalnu konferenciju „*Liberalizacija pristupa tržištu rada: potencijal regularne migracije i prevencija rizika povezanih s nesigurnim zaposlenjem i trgovinom ljudima*” 14. i 15. oktobra 2024. godine u Beogradu. Konferenciju su organizovali Ministarstvo rada, zapošljavanja, boračkih i socijalnih pitanja i Centar za zaštitu žrtava trgovine ljudima u Srbiji, uz podršku globalnog programa Njemačke razvojne saradnje „Oblikovanje razvojno orijentisane migracije” – MEG) i IOM-a. Konferenciji je prisustvovalo 146 predstavnika nadležnih državnih institucija, tužilaštava, sudova, nezavisnih institucija, međunarodnih organizacija, organizacija civilnog društva, istraživača i predstavnika akademske zajednice iz regije Zapadnog Balkana, uključujući devet predstavnika iz Bosne i Hercegovine.

NVO NOVI POČETAK - PRUŽANJE DIREKTNE POMOĆI

U okviru WBJAST projekta, IOM je u 2024. godini pružao direktnu podršku nevladinoj organizaciji Udruženje „Novi početak” s ciljem obnove aktivnosti organizacije i mobilizacije korisnika za aktivno uključivanje u prevenciju trgovine ljudima. Prepoznajući vitalnu ulogu učešća preživjelih u nacionalnim referalnim mehanizmima (NRM), posebno u oblikovanju donošenja odluka, politika i procesa reintegracije, Udruženju „Novi početak” kao jedinom udruženju koje predvodi preživjele u BiH, kroz projekt je dodijeljen grant za opremanje kancelarijskog prostora i interno kapacitiranje članova, a u cilju pružanja efikasne zaštite i podrške preživjelim.

DIGITALNA KAMPANJA PODIZANJA SVIJESTI O BORBI PROTIV TRGOVINE LJUDIMA

Kampanja je koristila društvene mreže IOM-a kako bi podigla svijest, promovirajući empatiju, kolektivnu akciju i podstičući pojedince da prijave sumnjive aktivnosti, potraže pomoć i uključe se u aktivnosti borbe protiv trgovine ljudima. Kampanja se fokusirala na ključna pitanja kao što su rizici radne eksploatacije (ciljajući lokalne i strane radnike), uključujući prisilno prosjačenje, opasnosti trgovine ljudima u digitalnom prostoru i sportu te promociju redovnih migracijskih puteva kao preventivne mjere. Do kraja aktivnosti, kampanja je dosegla 1,194. 614 osoba (51,4% žena, 700.181; 48,6% muškaraca, 662.547), sa 8,976.439 prikaza i 21.480 klikova na lažni oglas za posao.

LJETNA POLICIJSKA ŠKOLA, BRČKO DISTRIKT BiH



IOM je radio na podizanju svijesti o trgovini ljudima unutar lokalnih zajednica, podržavajući godišnju Ljetnu policijsku školu u Brčko Distriktu BiH. Ova inicijativa je održana od 20. do 23. augusta 2024. godine za učenike srednjih škola i fakulteta sa područja Distrikta, s ciljem ne samo unapređenja razumijevanja rada policije, već i poticanja aktivnog angažmana policijskih službenika u prevenciji kriminala, jačanja otpornosti mladih te poboljšanja društvene kohezije.

TREĆE DRŽAVNO TAKMIČENJE U SIMULIRANOM SUĐENJU



Uspostavljeno je partnerstvo sa Sveučilištem u Mostaru, koje je uključivalo podršku u organizaciji 3. godišnjeg državnog takmičenja u simuliranom suđenju „Ius Versus Iustitiam”.

Ovaj događaj, realizovan u saradnji s Misijom OSCE-a u BiH i Visokim sudskim i tužilačkim vijećem BiH, bio je posvećen temama ljudskih prava i trgovine ljudima.

Takmičenje se temeljilo na konkretnom slučaju trgovine ljudima koji se nalazi pred Evropskim sudom za ljudska prava. Učestvovalo je 16 studenata prava s univerziteta širom Bosne i Hercegovine, uz mentorstvo njihovih profesora.

SPECIJALISTIČKA OBUKA ZA POLICIJSKE SLUŽBENIKE: TRGOVINA LJUDIMA I RADNA EKSPLOATACIJA

IOM je, 23. i 24. oktobra 2024. godine u Buni, organizovao sektorsku obuku za kantonalne policijske službenike i policijske agencije, koja je imala za cilj osposobiti učesnike da prepoznaju ključne indikatore i znakove upozorenja potencijalnih žrtava trgovine ljudima (P/VoTs), istovremeno unapređujući njihovo znanje i osnažujući ih za efikasniju borbu protiv trgovine ljudima i radne eksploatacije.

Obuka se sastojala od teorijskog segmenta fokusiranog na identifikaciju indikatora i primjenu pristupa osjetljivog na žrtve, nakon čega su uslijedile praktične vježbe u kojima su učesnici primjenjivali i produbljivali razumijevanje stečenog znanja.

„TRGOVINA LJUDIMA— SIMULACIJA SUĐENJA U SLUČAJU RADNE EKSPLOATACIJE”

U saradnji sa Centrom za edukaciju sudija i tužilaca Federacije BiH, IOM je od 2. do 4. decembra 2024. godine u Konjicu, organizovao inter-sektorsku

obuku „Trgovina ljudima—simulacija suđenja u slučaju radne eksploatacije” za nosioce pravosudnih funkcija i predstavnike agencija za sprovođenje zakona.

Obuka je koristila simulacijski pristup, a učesnici su imali priliku preuzeti različite uloge, poput sudija, tužilaca i njihovih saradnika te uloge odbrane, optuženih, svjedoka i advokata, radeći na slučaju radne eksploatacije. Fokus je bio i na unapređenju pružanje adekvatne zaštite žrtvama tokom istražnog i sudskog postupka.



AKTIVNOSTI CENTRA ŽENSKIH PRAVA

Od jula do decembra 2024. godine, Centar ženskih prava je nastavio sa pružanjem besplatne pravne pomoći i psihološke podrške žrtvama trgovine ljudima te su u ovom periodu pružene 74 pravne usluge za žrtve trgovine ljudima.



Kontinuirana komunikacija je održavana sa oštećenima u kojoj su upoznati sa statusom postupka, sa osnovnim pravima koje imaju tokom postupka, sa pojmom krivičnog postupka, osnovnim pojmovima kao što su sud, pritvor, istraga, tužilac, saslušanje na sudu, saslušanje u istrazi, razgovor sa

vještacima, obaveza govorenja istine te sa pojmom imovinskopravnog zahtjeva, odnosno sa pravima koje imaju kao oštećeni tokom krivičnog postupka.

Nakon prijema nalaza i mišljenja vještaka medicinske struke za jednog oštećenog je sačinjen te sudu i tužilaštvu poslan prijedlog za ostvarivanje imovinskopravnog zahtjeva. Radi ostvarivanja i zaštite osnovnih prava oštećenih, Centar ženskih prava je bio u kontinuiranoj komunikaciji sa nadležnim tužilaštvima, centrima za socijalni rad te sudovima, ali i sa sigurnim kućama u kojima su malodobni oštećeni smješteni.

U izvještajnom periodu su provedene sljedeće aktivnosti:

- Potpisani protokoli o saradnji sa četiri centra za socijalni rad koji su postavili temelje dugoročne saradnje i usmjerenosti ka jačanju kapaciteta i resursa u radu na predmetima trgovine ljudima.
- Provedena kampanja informisanja institucionalnih i vaninstitucionalnih aktera, usmjerena na sve aktere u lancu sistema zaštite s kojima se dolazi u kontakt prilikom rada na predmetima trgovine ljudima. Također su informisani o mogućnostima korištenja servisa besplatne pravne pomoći i psihološke podrške za žrtve trgovine ljudima.
- Održan Stručni forum na temu „Uloga centara za socijalni rad za lakši pristup naknadi štete za žrtve trgovine ljudima“, 29. oktobra 2024. godine u Tuzli, koji je okupio 26 socijalnih radnika/ca sa područja Brčko Distrikta BiH, Tuzlanskog i Posavskog kantona te Bijeljinske regije i regije Istočna Bosna. Forum predstavlja doprinos stvaranju povoljnijeg ambijenta i systemske podrške za bolji položaj, efikasnije zastupanje prava i interesa, i zaštitu žrtava trgovine ljudima.
- Provedena kampanja „Glas žrtava trgovine ljudima“ koja prenosi priče žrtava trgovine ljudima i budi osjećaj potrebe da ni jedna osoba, niti jedno dijete, ne doživi slične oblike eksploatacije. Objavljeno je ukupno sedam kratkih videa koje je moguće pronaći na YouTube kanalu: <https://www.youtube.com/@CzppZZ/videos> kao i na pojedinačnim linkovima. Videa su korištena u svim aktivnostima Centra, ali i kao alat podizanja svijesti prilikom slanja saopštenja povodom Evropskog dana borbe protiv trgovine ljudima i Međunarodnog dana ukidanja ropstva.

- AlJazeera objavila tekst na temu iskustava u radu sa žrtvama trgovine ljudima: <https://balkans.aljazeera.net teme/2024/7/30/borba-protiv-trgovine-ljudim-iskustva-zrtava-i-pomagaca-u-regionu>

PROJEKAT „JAČANJE PROAKTIVNE IDENTIFIKACIJE, MENTALNOG ZDRAVLJA I PSIHOSOCIJALNE PODRŠKE ZA PREVENCIJU I BORBU PROTIV KRIJUMČARENJA I TRGOVINE LJUDIMA U BIH (I REGIONU)”

U okviru projekta „Jačanje proaktivne identifikacije, mentalnog zdravlja i psihosocijalne podrške za prevenciju i borbu protiv krijumčarenja i trgovine ljudima u BiH (i regionu)“, finansiranog kao dio GLZ-ovog regionalnog projekta EU4FAST, s ciljem jačanja uloge i učinkovitosti mjera proaktivne/mobilne identifikacije i adekvatnog reagovanja u pružanju zaštite i sigurnosti djece, potencijalnim žrtvama trgovine ljudima, World Vision BiH u koordinaciji i aktivnoj participaciji ključnih aktera za zaštitu djece, aktivno je radio na jačanju i uspostavljanju mobilnih identifikacijskih timova u 3 nove pogranične lokacije. U drugoj polovini 2024. godine, **Grad Cazin** zvanično je **formalizovao** status i rad MIT-a, čime je Unsko-sanski kanton osigurao uspostavu tri mobilna identifikacijska tima (Bihać, Bosanska Krupa, Cazin). Kako bi unaprijedili kapacitete i osigurali potrebnu podršku mobilnim identifikacijskim timovima, u ovom periodu su organizovane dvije dvodnevne obuke za ukupno 55 članova multisektorskih MIT-ova, policija i centara za socijalni rad, iz 11 lokacija (Tuzla, Banja Luka, Bijeljina, Bihać, Bosanska Krupa, Cazin, Mostar, Sarajevo, Visoko, Zvornik, Živinice) s ciljem bolje opremljenosti i kapacitiranosti članova u domenu proaktivne identifikacije.

EDUKACIJA ZA ČLANOVE CENTRA ZA SOCIJALNI RAD



Jednodnevna edukacija za 24 člana centra za socijalni rad Banja Luka organizovana je s ciljem podrške u jačanju njihovih znanja i kapaciteta u oblasti trgovine ljudima i prepoznavanju potencijalnih slučajeva i zaštite potencijalnim žrtvama.



PRIRUČNIK ZA IDENTIFIKACIJU I POSTUPANJE S POTENCIJALNIM ŽRTVAMA TRGOVINE LJUDIMA ZA OSOBLJE U PRIVREMENIM PRIHVATNIM CENTRIMA

Kako bi se osigurao efikasan referalni mehanizam unutar privremenih prihvatnih centara, World Vision BiH je, u partnerstvu sa Ministarstvom sigurnosti BiH i Službom za poslove sa strancima, izradio Priručnik za identifikaciju i postupanje s potencijalnim žrtvama trgovine ljudima za osoblje u privremenim prihvatnim centrima. Cilj ovog

priručnika je standardizacija procesa i jačanje institucionalnog odgovora na rizike trgovine ljudima. Priručnik pruža smjernice za pravovremeno prepoznavanje i adekvatno postupanje sa potencijalnim žrtvama trgovine ljudima, s posebnim naglaskom na ranjive kategorije poput migranata i tražilaca azila.


RADIONICA ZA UPOSLENIKE WORLD VISIONA U PRIVREMENIM PRIHVATNIM CENTRIMA

World Vision BiH je organizovao radionicu za 24 zaposlenika u privremenim prihvatnim centrima Ušivak, Blažuj i Borići kako bi ojačao njihove kapacitete da pruže 24/7 podršku i zaštitu korisnicima. Obuka se fokusirala na prepoznavanje potencijalnih slučajeva i primjenu smjernica iz Priručnika. Obučeno osoblje postalo je ključni akter u procesu upućivanja, osiguravajući pravovremenu podršku žrtvama i uključivanje relevantnih institucija.

OBILJEŽAVANJA EVROPSKOG DANA BORBE PROTIV TRGOVINE LJUDIMA

S ciljem obilježavanja Evropskog dana borbe protiv trgovine ljudima, World Vision BiH je u okviru projekta „Jačanje proaktivne identifikacije, mentalnog zdravlja i psihosocijalne podrške za prevenciju i borbu protiv krijumčarenja i trgovine ljudima u BiH (i regionu)”, finansiran kao dio GIZ-ovog regionalnog projekta EU4FAST, podržao radionicu na temu „Jačanje uloge mobilnih identifikacijskih timova”. Događaj je organizovan u saradnji sa Koordinacionim timom za borbu protiv trgovine ljudima Kantona Sarajevo s ciljem unapređenja i

boljeg razumijevanja uloge i djelovanja Mobilnog tima za proaktivnu identifikaciju potencijalnih žrtava trgovine ljudima na kantonalnom nivou.



IMENOVAN DIREKTOR ZAVODA ZA PRUŽANJE BESPLATNE PRAVNE POMOĆI HNK

Nakon višegodišnjeg zastoja, imenovan je direktor Zavoda za pružanje besplatne pravne pomoći HNK. Ova ključna odluka donesena je zahvaljujući intenzivnoj kampanji **Pravo na pravnu pomoć - Mostar**, koju su pokrenuli Udruženje „Dignitet” i NDC u okviru projekta PRAGG – *Proaktivni građani i građanke*.

Brojni građani Mostara, pravni stručnjaci, organizacije civilnog društva, vjerski predstavnici, mediji i javne ličnosti su dali svoju podršku. Imenovanjem direktora Zavoda, nakon 11 godina čekanja, konačno je otkočen proces pružanja besplatne pravne pomoći u HNK. Ova odluka direktno će pomoći hiljadama građana – ženama žrtvama nasilja, penzionerima s minimalnim primanjima, samohranim roditeljima, nezaposlenima, invalidima i mnogim drugima u stanju potrebe¹.

Iako je Zavod formalno osnovan prije 11 godina, do sada nije bio operativan zbog nemogućnosti

imenovanja rukovodstva. Sada kada je ovaj problem riješen, pred Udruženjem „Dignitet” je novi izazov – osigurati da građani u svim općinama dobiju pravovremenu informaciju o dostupnosti besplatne pravne pomoći. Nastavit će se saradnja s organizacijama civilnog društva i lokalnim zajednicama kako bi se osiguralo da svaka osoba kojoj je pomoć potrebna zna gdje i kako je može ostvariti.

PRVI SASTANAK RADNE GRUPE ZA IZRADU AKCIONOG PLANA ZA BORBU PROTIV TRGOVINE LJUDIMA ZA INSTITUCIJE BIH 2024-2027

Nakon usvajanja nove Strategije suprotstavljanja trgovini ljudima u Bosni i Hercegovini (BiH) za period 2024–2027, na državnom nivou je formirana Radna grupa za izradu Akcionog plana za borbu protiv trgovine ljudima za institucije BiH. Prvi sastanak radne grupe održan je 16. decembra 2024. godine u prostorijama Ministarstva sigurnosti BiH. Međunarodna organizacija za migracije u BiH (IOM BiH), u saradnji sa Centrom za istraživanje politike suprotstavljanja kriminalitetu (CPRC), pruža stručnu i logističku podršku ovom procesu.

Na prvom sastanku prezentovana je metodologija izrade akcionog plana, dok su članovi radne grupe upoznati s radnim materijalima, uključujući izvještaj o monitoringu i evaluaciji provođenja Strategije i akcionih planova za suprotstavljanje trgovini ljudima za period 2020–2023. Takođe, sastanak je iskorišten za usaglašavanje narednih koraka, metoda rada, rokova, kao i datuma i lokacije održavanja drugog sastanka radne grupe.

¹ Više na linku <https://startbih.ba/clanak/dignitet-i-ndc-pozdravili-odluku-vlade-o-odabiru-direktorice-zavoda-za-besplatnu-pravnu-pomoc-hnz-a/257273>

AKTIVNOSTI MISIJE OSCE-a U BiH U PRUŽANJU PODRŠKE BORBI PROTIV TRGOVINE LJUDIMA

Aktivnosti na izgradnji kapaciteta

Aktivnosti koje je Misija OSCE-a u BiH (Misija) provodila u drugoj polovini 2024. godini su u velikoj mjeri bile fokusirane na inicijative za izgradnju kapaciteta.

U svojim širim naporima da poboljša identifikaciju i pomoć žrtvama trgovine ljudima u kontekstu mješovitih migracija, Misija je sarađivala sa međunarodnim i domaćim partnerima na provođenju aktivnosti za izgradnju kapaciteta. S ciljem unapređenja razlikovanja između krijumčarenja migranata i trgovine ljudima, Misija je, u partnerstvu sa UNHCR-om, organizovala obuke, 15. i 17. oktobra u Banjaluci i Sarajevu. Na ovim obukama prisustvovala su 54 viša policijska službenika (12 žena i 42 muškarca).



Misija je 26. septembra organizovala obuku usmjerenu na žrtve o dječjem prosjačenju kao obliku trgovine ljudima u Zenici. Ova obuka okupila je 33 stručna lica (8 žena i 25 muškaraca), uključujući policijske službenike i socijalne radnike, u svrhu rješavanja izazova unutar nacionalnog referalnog mehanizma u vezi sa slučajevima dječjeg prosjačenja.

Misija je također, zajedno sa domaćim i međunarodnim partnerima, doprinijela godišnjem Stručnom savjetovanju tužilaca održanom u Neumu od 1. do 4. septembra, podržavanjem [panel](#) diskusije na temu procesuiranja predmeta trgovine ljudima. Savjetovanju je prisustvovao 31

učesnik, uključujući tužioce, predstavnike organa za provođenje zakona, akademike i predstavnike međunarodnih i nevladinih organizacija.

Prepoznajući važnost edukacije budućih pravnika, Misija je, u saradnji sa međunarodnim partnerima, podržala jedno takmičenje i jednu radionicu za studente prava u 2024. godini. Od 2. do 4. oktobra, Treće državno univerzitetsko takmičenje u simuliranom sudskom postupku u predmetu trgovine ljudima baziranom na sudskoj praksi Evropskog suda za ljudska prava u Mostaru okupilo je studente prava iz Bihaća, Mostara, Tuzle i Zenice. Pored toga, Misija je 9. decembra organizovala radionicu na temu borbe protiv trgovine ljudima za studente Pravnog fakulteta u Banjaluci.

Prevod publikacije OSR/CTHB - Nevidljive žrtve: Poveznica između invaliditeta i trgovine ljudima



Misija je nastavila pružati podršku Bosni i Hercegovini u unapređenju odgovora na trgovinu ljudima. Kako bi podigla svijest o vezi između invaliditeta i trgovine ljudima, Misija je prevela publikaciju OSR/CTHB [Nevidljive žrtve: Poveznica između invaliditeta i trgovine ljudima](#).

Poveznica između invaliditeta i trgovine ljudima.

U ovom izvještaju se iznosi kako trgovina ljudima utiče na osobe sa invaliditetom i nudi preporuke za integraciju pitanja vezanih za invalidnost u politike i mjere za borbu protiv trgovine ljudima.

Međunarodna saradnja



Misija je omogućila koordinatore za borbu protiv trgovine ljudima Republike Srpske da na sastanku nacionalnih koordinatora i izvjestilaca te

ekvivalentnih mehanizama, održanom u Beču 12. i 13. septembra 2024. godine, predstavi entitetske napore u smislu uključivanja žrtava i predstavnika manjina u akcione planove u oblasti borbe protiv trgovine ljudima.

Pored toga, Misija je podržala učešće BiH na regionalnoj konferenciji o etičkim lancima snabdijevanja održanoj 16. i 17. septembra u Budvi. Regionalnu konferenciju je organizavao OSCE-a.

Ovaj događaj se fokusirao na strategije za borbu protiv trgovine ljudima u svrhu radne eksploatacije.

Dva predstavnika iz BiH pridružila su se 43 učesnika (23 žene i 20 muškaraca) iz sektora za borbu protiv trgovine i poslovnog sektora u zemljama regiona. Misija je takođe omogućila učešće predstavnika Ministarstva sigurnosti BiH na radionici održanoj u Beču 30. oktobra, na kojoj je održao prezentaciju o borbi protiv diskriminacije protiv manjinskih grupa i o unapređenju pristupa pravdi za žrtve trgovine ljudima.

Aktivnosti na podizanju svijesti


Povodom obilježavanja Svjetskog dana borbe protiv trgovine ljudima, Misija OSCE-a u BiH i Ured OSCE-ove specijalne predstavnice i koordinatorice za borbu protiv trgovine ljudima organizovali su, 30. jula 2024. godine, radionicu na temu najranjivijih grupa i trgovine.

Radionici je prisustvovalo 30 učesnika (17 žena i 13 muškaraca), predstavnika ministarstava, tužilaštava, civilnog društva i međunarodnih organizacija koji su razgovarali o ugroženosti manjinskih grupa, djece i lica s invaliditetom. Misija je 18. oktobra 2024. godine provela kampanju na društvenim mrežama povodom obilježavanja Evropskog dana borbe protiv trgovine ljudima.




REZULTATI PRAĆENJA PREDMETA TRGOVINE LJUDIMA

Misija OSCE-a u BiH prati predmete trgovine ljudima i srodne predmete s ciljem identifikovanja najboljih praksi i nedostataka u odgovoru pravosudnog sistema na trgovinu ljudima. U periodu između 1. januara i 31. decembra 2024. godine, Misija je pratila 33 predmeta koji se odnose na krivična djela pravno kvalifikovana kao trgovina ljudima u skladu sa važećim zakonodavnim okvirom u BiH ili, bez obzira na njihovu pravnu kvalifikaciju, predmete u kojima su bitne činjenice ukazivale na postojanje zakonski propisanih elemenata krivičnog djela trgovine ljudima.




Od ukupnog broja praćenih predmeta, 26 predmeta je još u toku, a 7 predmeta su okončana u periodu između 1. januara i 31. decembra 2024. godine.



Praćeni predmeti uključivali su 64 optuženih (9 žena i 55 muškaraca). Kao što je prikazano u grafikonu ispod, praćeni predmeti odnose se na krivično djelo trgovine ljudima u skladu s članom 186. Krivičnog zakona BiH (KZ BiH) u 6 predmeta;


član 146. KZ RS u jednom predmetu; krivično djelo trgovine ljudima iz člana 210a KZ FBiH u pet predmeta i tri predmeta iz člana 210b KZ FBiH; i krivično djelo trgovine ljudima iz člana 207a KZ BDBiH u dva predmeta.



U dva praćena predmeta sudske odluke se odnose na krivično djelo međunarodno navođenje na prostituciju iz člana 187. KZ BiH; u četiri predmeta sudske odluke se odnose na krivično djelo navođenje na prostituciju iz člana 210. KZ FBiH.

U devet predmeta prijave se odnose na krivično djelo zanemarivanje i maltretiranje djeteta ili maloljetnika (KZ FBiH, čl. 219 - devet predmeta, KZ RS, čl. 207 - 0 predmeta, 2017. KZ RS, čl. 187 - 0 predmeta, i KZ BDBiH, član 216 - 0 predmeta).


Ostale optužbe u praćenim predmetima uključivale su krivična djela kao što su zadovoljenje pohote pred djetetom ili maloljetnikom (KZ VBiH čl. 209 - tri predmeta); zlostavljanje djece radi pornografije (KZ FBiH čl. 211 - tri predmeta i KZ RS čl. 175 - jedan predmet); upoznavanje djeteta s pornografijom (FBiH čl. 212 - dva predmeta); spolni odnos sa djetetom (KZ FBiH čl. 207 - dva predmeta); neovlašćena proizvodnja i stavljanje u promet opojnih droga (KZ FBiH čl. 238 - dva predmeta); otmica djeteta ili maloljetnika (KZ FBiH čl. 217 - jedan predmet); protivpravno lišenje slobode (KZ FBiH čl. 179 - jedan predmet); silovanje (KZ FBiH čl. 203 - jedan predmet); bludne radnje (KZ FBiH čl. 208 - jedan predmet); vanbračna zajednica sa djetetom ili maloljetnikom (KZ RS čl. 184 - jedan predmet); nasilje u porodici (KZ BDBiH čl. 218 - jedan predmet).



U sedam predmeta u izvještajnom periodu (januar - decembar 2024. godine) deset optuženih su oglašeni krivim, a jedan optuženi je oslobođen. Petero optuženih su osuđeni na uslovne kazne, četiri optužena na kaznu zatvora a jedan optuženi je novčano kažnjen; najniža izrečena kazna je uslovno tri mjeseca zatvora te novčana kazna u iznosu od 300 KM, dok je najteža izrečena kazna 10 godina zatvora.



Sljedeći grafikon detaljno opisuje krivična djela u predmetima koji su okončani u izvještajnom periodu:





DRŽAVNI KOORDINATOR ZA BORBU PROTIV TRGOVINE LJUDIMA I ILEGALNE MIGRACIJE U BIH

Ministarstvo sigurnosti BiH
Trg BiH
71000 Sarajevo
Bosna i Hercegovina

Tel.: +387 33 492 455
+387 33 492 452
+387 33 492 420
+387 33 710 530
Fax: +387 33 710 531
e-mail@ureddk@msb.gov.ba

OSCE Organization for Security and
Co-operation in Europe
Mission to Bosnia and Herzegovina

Misija OSCE-a u BiH je podržala izradu ovog materijala.
Svako gledište, izjava ili mišljenje, izraženo u ovoj publikaciji, a za koje nije izričito naznačeno da potiče iz Misije OSCE-a u BiH,
ne odražava nužno zvaničnu politiku Misije OSCE-a u BiH.